

# 3 IONI

## Ioni yana kiluma 'ana vetonu.

Leta de'e 'ana vetonu Ioni i kilumi siwe kebu 'ana wagava i da yatoi, 'asa'aiana i vo, Yau 'auvea, yamu to'edakumeta 'waikuyega.” Letanina i kilumi i nago tamu tovetumagana 'waineye, 'ana wagava Gaiasa. I kiluma i subiai yana 'isave'avina Yaubada yana tofolovavo 'waidie faifaina. We'e tamu tovetumagana 'ana wagava Diotilifi yana sauluva i awavesakoyeni. De'e letanina 'ana 'idi side bani'odi.

Vona vekaiwa. 1:1-4

Gaiasa 'ana subia. 1:5-8

Diotilifi 'ana awavesako. 1:9-10

Dimitilasi 'ana awave'atumai. 1:11-12

Yana 'alanuai. 1:13-15

---

<sup>1</sup>“Yau 'auvea, yamu to'edakumeta, a vekaiwa 'omu iaku Gaiasa 'waimuye, a nuakalikaliemu mogitana. <sup>2</sup>Iaku, a vevelu'ui faifaimu bega kebu tamu vita i na sousouyeni 'waimuye, wata 'amu lautonova matatabuna 'atumaiddi, bani'odi yamu folova wata yamu sauluva 'akonadi 'atumaiddi Yaubada mataneye. <sup>3</sup>A 'asetai yamu folova wata yamu sauluva 'atumaiddi Yaubada mataneye fai edavo tovetumagana 'ifwaidi i maia i lu'ivona 'waikuye ma yamu dumwebika Yaubada yana nuanua tonovidi 'u vevematayakeyakedi. Valamunina faifaina a sosoana bwaikina. <sup>4</sup>“Nani fuedi faifaidi a sosoana, siwe 'ai'edi a na nogai natukwavo Keliso yana 'aila'a, Yaubada yana nuanua tonovidi i vevematayakeyakedi, 'eba sosoana bwaikaotogina 'waikuye.

**Gaiasa 'ana subia.**

<sup>5</sup>“Iaku, mogitana 'omu ma 'amu vetumagana 'u folofolova edavo tovetumagana 'waidie. Tovetumagananidi 'ifwaidi taunidi tolau'age-vuvua, 'ifwaidi 'u 'isa'innanadi 'ifwaidi 'u bavuyedi, siwe matatabudi 'u

'i'isave'avinidi. <sup>6d</sup>I veifufu Keliso yana 'Aila'a 'waidie yamu 'aivaita wata yamu nuakalikali faifaidi. I na tautauyaga, nuanuaku 'u na 'ivaisedi wata 'adi 'ibua 'u na veleveledi, nika Yaubada i na sososoana yamu folova faifaina. <sup>7-8e</sup>Ida Keliso yana 'Aila'a i lubwaineda tomotoganidi ta na 'i'ivaisedi fai yadi 'atamana i 'iawedi i lalau'age-vuvua Keliso faifaina. I lalau'age-maimaiga, kebu tamu 'aivaita i da veveluagai Yaubada 'ana tobavu 'waidiega. Ta na 'i'isave'avinidiga, 'asa'aiana matatabuda ta ve'ivaivaita bega Yaubada yana nuanua tonovidi valana, i na vebwaika tomotoga 'waidie.

### **Diotilifi wata Dimitilasi faifaidi.**

<sup>9f</sup>Basenadi tamu yaku leta a kilumi tovetumaganavo taiadi 'wa miamianiga 'waidie, siwe Diotilifi, kumanina nuanuana i na veto'edakumeta 'waimie, yama nuanua i vedumwe'ai'aiedi. <sup>10</sup>Tutuyanina a na wai, yana sauluva sakoidi a na lu'ivoneyedi 'waimie. I vevebonaivoyema wata i awavesakoyema, siwe wata tamu sauluva sakoiotogina i 'i'idewai. Tutuyanina Yaubada yana tofolovavo i le'wale'wai i baibaila, wata 'ai'edi egavo nuanuadi i na lu'uma'umaiedi, i tatalabodedi, we'e i na lu'uma'umaiediga igodi nuanuana i na veugeugedi Keliso yana 'Aila'a 'wainega.

<sup>11</sup>Iaku, a nuakalikaliemu, sauluva sakoidi kebu 'u na vetutuyamediga, nuanuaku sauluva 'atumaidi 'u na vevetutuyamedi. Egavo i vevesauluva 'atumaina taunidi Yaubada natunavo, we'e egavo i vevesauluva sakoina taunidi kebu Yaubada i da 'asetai mogitana.

<sup>12</sup>Tomotoga fuedi i vo, Dimitilasi yana sauluva 'atumaidi." Bani'odi i voneyediga vona mogitana fai yana sauluva tonovidi. 'Ima wata bani'odi a awave'atumaieni, 'akonadi 'wa 'asetama ava'ai 'a na voneyediga tonovidiamo a na vona.

### **Yana vona nuakalikali 'ana 'eba ve'a'ava.**

<sup>13</sup>Nuanuaku 'waimie a na veifufu manamanawena, siwe kebu kiluma 'aisena 'wainega. <sup>14</sup>A nuani 'awaie tauniotogiku a na waimo taiadi ta na veifufu.

<sup>15</sup>A vevelu'ui faifaimu, nuanuaku Yaubada nuanua bikadi i na velevelemu mia 'atumaina taiadi. Emwavo de'e bei yadi vekaiwa i vetunei 'waimuye. Nuanuaku edavo taiadi 'wa miamianiga, matatabudi 'waidie 'u na lu'ivona yaku vekaiwa.

'Asa'aiana bani'odi,  
Yau Ioni.